

قهرمانلارینی اونودان میلت اؤزگه لره قول اولار

اؤیرنجی درگسینین باش سؤزو

اودلار یوردو آذربایجانیمیز تاریخ بویو یوزلرجه قهرمان اؤزونو گؤرموش، گؤرور و یقین گله جکده گؤرجکدیر. قهرمانلار میلتین چتین گونلرینده عرصه یه گلیب، گؤردوکلری ایش، دانیشدیقلاری سؤز و اؤزلریندن گؤستردیکلری قورخمازلیق و شهامتته گؤره، تاریخین آمانسیز و رحمسیز قضاوتیندن باشی اوجا چیخیب، آدلارینی تاریخ صحیفه لرینده حک ائدیبلر. بابک، جوانشیر، ستارخان، باقیرخان و ... کیمی قهرمانلاریمیز ساواش مئیدانلاریندا، نسیمی، فضولی، صمد وورغون، شهریار و ... سؤز مئیدانلاریندا و یوزلرجه باشقا قهرمانلاریمیز سیاست، موسیقی، بیلم و ... مئیدانلاریندا، آذربایجانیمیز اوچون باشی اوجاللیق و گونج قازانیلار.

اینسانلارین یاشاییشی چئشیدلی ساحه لره بؤلوندوگو کیمی، هر ساحه ده ده قهرمانلاری اولابیلر. بؤیوک، میلی و اولوسال شاعیریمیز بختیار واهاب زاده دئمیشکن، کوراوغلو یالیز قیلینج ساحه سینده یوخ، بلکه سؤز و بیلم ساحه سینده ده اولمالی دیر:

هانی بو ائلین مرد اوغوللاری

آچین بره لری، آچین یوللاری

هانی بو عصرین اؤز کوراوغلوسو

قیلینج کوراوغلوسو، سؤز کوراوغلوسو

هر چاغین اؤزونو گؤره قهرمانلاری و کوراوغوللاری اولمالیدیر. نئچه یوز ایل بوندان قاباق یاشایان کوراوغلوموز، چنلی بئله آت مینیب، قیلینج اوینادیب، نعره چکیب دلی لرینه " **هایدی دلی لریم! یورویون** " سؤیله میسه ده، بو گونکو کوراوغوللاریمیز چاغین چئشیدلی ساحه لرده اولان ساواش مئیدانلارینی دوشونوب، اورادا لازیم اولان سیلاحلاردان یارارلاناراق، اؤز میلی و اولوسال وارلیقلاریندان دیفاع ائتمه لی دیرلر. بوگون، دنیا اوزرینده اولان ساواش ساحه لری یالیز نظامی یوخ، بلکه کولتورل، ائقتیصادی، سیاسی، توپلومسال و ... ساحه لرینده اوز وئیرر. بئله بیر دورومدا یارانان قهرمانلاریمیز، چئشیدلی ساحه لرده اولابیلر و یالیز قیلینج کوراوغلوسونا فیکرلشیرسک، میلی حرکتده اوغور قازانا بیلمه یه جگیک.

سون یوز ایل تاریخیمیزده چوخلو اولایلار شاهید اولان اولوسوموز، بو گون میلت لشمه پروسه سینا تام بیتیرمگه ساری گئدیر. مشروطه اینقیلابیندان بری اوز وئرن اولایلار، بو پروسه نین تکمیل لشمه سینده بؤیوک روللاری اولموشدور. خیابانی حرکتی، ۲۱ آذر حرکتی، ایسلامی اینقیلابین اوغور قازانماسیندا اوز وئرن حادثه لر و سون ایللرده باشلانان یئنی تام میلی دوشونجه یه مالیک اولان حرکتلر، بیزی بو نائیلیته چاتماغا اوغرادیلار. بو اولایلارین هر بیرسینده یوزلرجه ادلی - آدسیز، سانلی - سانسیز، تانینمیش - تانینمامیش قهرمانلار صحنه یه گلیب، بوتون ساحه لرده اؤزلریندن قهرمانلیق گؤستریب و

میلتمیزی باشی اوجا ائدیبلر. یقین میلی حرکتیمیزین قهرمانلاریندان آد آپاراندا، آدسیز قهرمانلاردان دا یاد ائتمه لی بیک. اۆلکه میز ایرانا تحمیل اولان سککیز ایلیک ساواشین سونا چاتماسیندان سونرا، اولوسوموز اؤز وارلیغی و کیملیگینی قوروماق، دیرچلمک و میلی حاقلارینی آلماق اوچون، بوتون ساحه لرده- توپلومسال، سیاسی، کولتورل ساحه لرینده- گوجلو حرکت باشلابیدیر. بو حرکت هر کیمسه بیر آد یاپیشدیرماق ایسته ییدیر. بو وئریلن آدلارین ایچینده "جنش ملی آذربایجان"، "جنش ملی - مدنی آذربایجان"، "حرکت ملی - فرهنگی آذربایجان"، "جنش ملی - دموکراتیک آذربایجان" و ... آدلارینی گۆرمک اولار. بو آدلاری دستکله یین شخص یا گروهلار هره سی بیر دوشونجه و یا دوروم اساسیندا بو آدلاری حرکتیمیزه وئرمیشلر. آنجاق تام میلی دوشونن فیکیرداشلاریمیز، بو حرکتین آدینی "آذربایجان میلی حرکتی" قویموشلار.

دئدیگیمیز کیمی، میلی حرکتیمیز چئشیدلی ساحه لره مالیک اولاراق، اولوسوموزون غئیرتلی بالالاری هره سی بو بؤلوملرین بیرسینده و بعضاً نجه سینده چالیشیق آپاریرلار. آذربایجانین غئیرتلی ایگیدلرینین بیر سایى دیل، فولکلور، تاریخ و شعر ساحه سینده کوراولوموز اولورسالار، بیر سایى دا موسیقی، سیاست و توپلومسال ساحه لرین کوراولوسو اولورلار. بو آرادا هر بؤلومده چالیشیق آپاران آذربایجان اولادلارینین ایشی، اؤز یئرینده دیرلی و اؤنملی دیر. هئچ بیر کیمسه نین ده بو ایشلرین بیرسینی زای ائدیپ، **آچاق ایشدیر!** دئمگه حاقی یوخدور. نییه کی، بوگون اؤزلرینه میلی بوج بیلپ، عمل مئیدانینا آياق قویان ایگیدلریمیز، چوخلو شخصی منفعتلردن ال اوزوبلر. رحمتلیک شهید رجائی دئمیشکن: "بئله بیر دورومدا سوروملولوق قبول ائتمک، یا عشق دیر یا دا دلیلک". یقین کی آدسیز- سانسیز مینلرجه آذربایجان بالاسی، اؤز میلی وارلیغینا عاشیق دیرلر. اول بیلرکی بیر نجه نقرده شخصی منفعتلر و یاخود آد قازانماق اوچون بو حرکت قاتیلسینلار. آنجاق بو حرکتده چالیشانلارین چوخو، بیر میلی عشق و میلی تعهود اساسیندا چالیشیرلار. نییه کی "تعهود دونیانین ان باهالی گنجی اولان آزادلیق و اولوسلارین یاشام حاقینی قورویان بیر اژدهادیر".

میلی حرکت بوتون میلته عاییددیر و هئچ بیر کیمسه یا گروه اونو اؤز آدینا باغلایا بیلمز. دنیا اوزونده اولان حرکتلره باخیب، میل چیلگی بیر سیاسی دوشونجه اولاراق آراشدیرساق، بونو راحتجاسینا باشا دوشه بیلرک. میل چیلک خاص بیر ایدئولوژیا مقید اولان بیر دوشونجه دئیل، بلکه میل ایچینده چئشیدلی گروهلار و ایدئولوژولار اولدوغو کیمی، میل چیلک حرکتیندا دا چئشیدلی ایدئولوژو و دوشونجه یه مالیک اولان شخص و گروهلار اولابیلر. آنجاق بو چئشیدلی ایدئولوژو و دوشونجه یه مالیک اولان گروهلار و شخصلری بیر میلی قالبده بیر یئر توپلایان فاکتور، میلی منافع دیر. البته کئچمیشده دئدیگیمیز کیمی، بیزی "میلی سعادت" چاتدیران "میلی منافع"، بیزیم فیکریمیزجه سئچلمه لی دیر.

باشقا اؤنملی و دیرلی مسئله، هر یئرده و هر چاغدا "میلی سرمایه" لریمیزین قورونماسی دیر. هر میلچگی بیر میلی سرمایه ساییلاراق، اؤزل بیر سایغی بسلمگه لایق دیر. بو سایغی و احترام او شخصین نه فیکیره و ایدئولوژیا باغلی اولماغیندان آسیلی دئیل. تأسوفله بیر سیرا تازا میلی حرکت آياق قویانلار و یاخود بیر سیرا آچاق دوشونجه لیلر، بو سرمایه لرین دیرلرینی نظره آلمایاراق، اولاری تاپدالاییرلار. هئچ کیمسه "نقد" ائتمگی رد ائتمیر، آنجاق نقد ایله کورلاماغین (تخریب) چوخ فرقی واردیر. نقد ائدن کیمسه هر زاددان اؤنجه، طرفین چکدیکگی زحمتلرینی بیان ائدیپ، سونرا دوشوموش نوقطه لری دلیل و

منطیقله بیان ائتمه لیدیر. ایفراط و تفریط هر ایکسی بیر قایچی نین تییه سینه بنزر. بو تییه لرین ایتی اولماسی، هر بیر حرکتی یولوندان چاشدیریب و سونوجدا آرادان آپارار.

بوتون میلی حرکتده چالیشانلار بیلمه لی دیرلرکی، بو یول عشق و دوزلوک یولودور. هابئله بو یولون اوزون و چتین اولماسی، بیزه منطیقلی چالیشماغی تکلیف ائدیر. میلی حرکت اوغروندا چالیشماق مئیدانی او قدر گئیش دیرکی، هنج کیمسه باشقاسینین یئرینی دار ائتمز.

اومود و آرزیمیز میلی حرکتیمیزین گونو- گوندن گئیشلنمه سی و دموکراتیک حالدا بوتون آذربایجان میلی منافعینی دوشونن شخص و گروهلارین ایشله مه سی و امکداشلیغی دیر.